

【琉璃王為報宿怨，欲盡殺釋種】

（科註第910頁第6行第437集2012年7月19日）

《三藏法數》「流離王殺釋種」條：佛在世時，波斯匿王新紹王位，使臣求親於迦毗羅國釋種之家，時摩訶男婢生一女，顏貌端正，送與波斯匿王。後生一子，名曰流離。及年八歲，與梵志子好苦，詣摩訶男家。時迦毗羅國新起一講堂，欲請如來於中供養。爾時流離太子往至講堂，即陞師子之座。時諸釋種見之，罵言：此婢生物，敢入中坐。於是出語梵志子好苦曰：此諸釋種，捉我毀辱，乃至於此。我後紹王位時，汝當告我此事。流離太子後紹王位，好苦以前事告之。流離集兵往伐釋種。

佛告比丘，往昔之時，此羅閱城有捕魚村。時世饑儉，彼村有池多魚。時城中人，向於池中捕魚食之。池中有二種魚，一名麩，二名多舌，各懷報怨。時有一小兒在岸，見魚跳而喜，以杖打彼魚頭。爾時羅閱人者，今釋種是。麩魚者，今流離王是。多舌魚者，今梵志好苦是。小兒者，即我身是。以是因緣，故流離王殺釋種也。（梵語波斯匿，華言勝軍。梵語迦毗羅，華言黃色。）

○琉璃王

《佛學大辭典》「毘琉璃」條(節錄)：國王名。又稱流離王，瑠璃王，婁勒王，維樓黎王，樓黎王，毘婁勒王等。(中略)生時與琉璃寶俱，故號毘琉璃，又由大夫人之讖(音趁，預言也)，而名惡生王。舍衛國(新曰室羅伐悉地國)，波斯匿王(新譯勝軍王)之子，末利夫人所生。弑父王而嗣位，又以舊怨滅迦毘羅城之釋種。